

聖宋名賢五百家播芳大全文粹卷第七十

勸緣疏

修造

光孝寺經藏疏

孫仲益

種福有福田施佛得佛果但志心三四五佛悉皆供養應獲福千
萬億劫不可稱量况毗盧藏所傳大乘經皆釋迦文所說真是語
若聞此經典不驚不怖不畏則所得功德无量無數無邊種種裝
嚴極八十一好之妙生生得度現三十二應之身眷此鴻因故應
樂施

開利寺建經藏榜疏

釋迦如來為此因緣出現塵世彌大士建此寶藏示跡天空眷言
四十九年駕說五千餘卷若欲一切處作大佛事要須諸信士勸
轉法輪况經九死而取經譬捨全身而求偈原夫至聖發四弘之
願蓋為羣生離八風之波今既見佛聞經便好迴光反照庶續无

窮之慧命永作廣大之津梁更能抽出趙州轉處機關自然會得
藥山遮眼時節

大通修法堂方丈疏

呂伯恭

翬飛鳳翥昔雄誇於諸方鼠迹蝸涎今浸積於舊觀遍謁檀那之
助聿圖輪奐之新善法堂前无復草深之嘆淨名室內再聞花落
之香

修法雲寺浴室疏

東坡

浴為淨因佛所深讚以一念頃破塵垢緣於三際中獲妙湛樂永
為悉達嘗感此以受生爰逮跋陀亦因之而悟法本院規模素陋
年祀寔多方澡雪於精神或震凌乎風雨升堂入室未稱真遊運
水般柴殊淹妙用以新革故今正是時施及受人此俱功德

德清慈相脩月池疏

呂伯恭

斷崖吐月纔出半規古甃涵星尚懷全璧又矣宝奩之廢時哉玉
斧之修護此寒清被其氛翳名高詩社再傳和仲之符價重帝城

復置文饒之迹

吳江教院塔塔疏

孫仲益

長者布金號阿蘭若僧伽留錫在空堵波人依十方之尊地接三
江之勝龍天栖止百宝莊嚴劫火洞然一夕煨燼仰勤檀施共締
鴻因端然三百尺之高湧青蓮於池上矚若干万人之衆標白月
於拍端

修明招寺疏

呂伯恭

一生能著幾衲履阮史君陳迹猶存添得為山笑轉新獨眼龍清
風未及境因人勝物由人興眷此道場是真福地老屋不禁風雨
日就歇傾巨材宏架翬飛誰當借助遇着挿一莖草底檀越梵刹
自周坐使不勞斧斤阿師伎倆俱尽向中有眼笑裏知幾索著不
來切忌蹉過

祖師院修河堤疏

三乘佛地六祖道場適憂東去之驚波將害西來之勝境既匪曹

溪一滴蓋障狂瀾如得陶朱千金乃成彼岸幸矜誠懇特繫芳銜

修興福院疏

崎山勝踐古聖伽藍遠接滄波浸灌湖田幾千頃傍連粉雉鎖斷
闔城十萬家檜栢排青峯岌擁禾氣象依然森列門庭那得蕭條
興廢在時扶持有待更勞斧鑿振居士植福之基願發囊經作如
來顯化之地

修忠靖廟疏

棟宇恢闕子厚嘗致誠於太白堂陞頽落曷黎亦軫念於湘君神
祇既安休祥自至惟黃柏洋場之勝境有忠靖昭烈之行祠无感
不通所求皆應天寶之際誓挺身於二賊之間熙寧以來尤發靈
於七閩之地一指之弃千載如生頽廟貌之未崇慮神遊之弗稱
此邦之念在是過者為之憮然欲廣規摹一新樞殿何以侈憑
附之質丹青之飾未能辦瓴甓之費板榦之工度財約千餘緡落
成需二三載願推樂施同集殊緣特開嚴毅之顏以介明靈之祐

兩賜協序即看弥望之耕桑詩書礼家會見蒲門之朱紫

修龍王廟疏

九秋龍躍万里雲從方平陸以為淵念靈祠之无所願叩陶朱之
富室共新彭蠡之離宮神則莫居障百川而歸海人斯蒙福隨四
序以宜家

修通濟廟疏

東坡

南國大川洞庭極險上游羣祀通濟最靈聖是閔陰陽宰制生死
盛吸江吞海之氣有分風擘浪之權舟楫中流如幕上之巢燕人
依大茈若仰息之嬰兒自非无知孰敢不敬而此廟結構已久理
葺正煩大招開濟之徒肇興重營之役期成功於不日共招福於
來今

造鴻橋疏

東里子產以乘輿而濟人見譏孟子持地菩薩作橋梁而度眾具
載楞嚴故知儒釋之心咸知功利之及物願此度漢之名郡是

為并絡之要津頃緣水災大作民害鴻橋既壞人迹不通岸上多
爭度之喧舟中有掬指之患州縣隔絕氣象荒蕪更恐文物之索
然夫豈士夫之忍視須憑四邑之領袖共作一邦之表儀輒布悃
誠共圖勝事

楓橋砌街疏

孫仲益

車輪覆井彭公之懼溺則然乘輿濟河鄭僑之樂施如此乃眷吳
門之北寔惟洳水之衝冰雪之辰風雨之夕陷泥蹶塊駕万斛之
舟挽葛捫蘿爭一線之路呻吟相屬顛仆盈前欲出諸積淖之中
共寘此坦塗之上雖道路橋梁不治盍現宰官身而山河大地皆
平寔行菩薩道

塑像 經典 鑄鐘 化供 佛事 度牒

靈壽詩院塑佛疏

孫仲益

吳道子畫豐都宮而懼罪者不殺韓吏部題木居士而求福者无
窮雖名四大假合之身自成一念寔是之相庶憑善知識結此六
因緣啓發真心極種種相好裝嚴之妙增崇報地為生生福德具
足之因

廣孝院鑄羅漢疏

孫仲益

變化飛行本无住相莊嚴淨供須假信心欲持飾像之良工當有
布金之長者願祈樂施共結勝緣不到石橋見尊者之五百何妨
寶聚滿世界之三千

君子院塑佛疏

當山住持比丘某甲為今大毀釋迦文佛以次諸像裁削衣俾小未
全好相匪肅瞻依且欲改造具足端嚴種種成就資爾眾信有大
檀越聞而喜躍恭敬作禮而發是言事无難易惟在一念一念精
進平地須弥若墜一念須弥自壞今此佛像亦復如是以是因緣
而說偈言火不在薪无薪无火月不在水有水有月佛不即像亦
不離像即像求佛閉門留月離像求佛毀鍾存鐘塵塵相因无有
是處諸仁者如彼古人燔燒木像以思惟心指像作佛云何惡報

不當其身若人能以七宝嚴飾或用鐵木漆布及泥又如童子爪
甲戲及以闡提心指像非佛云何漸積功德无量興大悲心皆成
佛道諸仁者認像非佛別无方便名為凡夫認心是佛不假莊嚴
名為外道此佛此像非即非離不作妄觀真觀自現无上菩提檀
波羅密

造佛菩薩像疏

趙莊叔

佛无在无不在深山窮谷荒郊斷斷虎豹蛇虺之所宅榛莽塵穢
之所聚一念清淨佛即現身蓋其道以无有為宗以一死生齊寵
辱為當然故曰欲求寂滅樂當參沙門法彼視其身如泥沙塊壤
破碎掃除踐履澆汨有所不顧而况夫堂堂金碧丹雘高潔
深廣燦爛是耀而喜於居之哉雖然天下之人達者寡而流者多
不嚴乎其外彼之中必有所不敬不示之以相彼之真是必有所
不固是故无量宝臺鐘磬幢幡香花燭燈種種具足列于吾前者
蓋所以化夫不敬不固有不得不然者也丹山慧日寺有僧紹緣
者年甚少事佛甚謹常以寺闕菩薩之像為慊曰是罪在我乃謀
乞貲二万於諸大檀越作菩薩像覆以夏屋夫豈不知華靡之不
足以奉佛然區區于是者其志蓋遠矣哉人孰不欣然從之異日
必有瞻礼再拜因敬生悟者此皆紹緣與諸施財者之功也黃君
浩然移書於某具述紹緣之意請書其然因為書其所以然

香林院造佛疏

院於咸平初衛師所造大毀功德星露儀刑墜落有如見此无不
愴然尚恐宗風從此陵替某等今欲揭此一大事示諸長者有能
於此五佛二神上結因緣啓願見聞各各起大歡喜興此因緣
譬如衲衣不在一縷无一縷不能成衲又如以鑑分形形雖非鑑
而設鑑知形以像取佛佛雖非像而設像見佛謂鑑不是形而鑑
現形謂像不是佛而像見佛千人万人載瞻載仰故曰不因裝嚴
化衆生焉得衆生成佛道

繪三清御容疏

趙莊叔

人心之好善也如水之濕如火之燥其所以自賊至於桀紂盜跖者外不見其所敬故溷亂於中至於迷而不返也吾嘗使天下之人春秋冬夏飲食起居日常見其所不能見知其所不能知見者可敬而不可漫掃除渤滌以葆其美不善之心何由而生是故目者心之委也心者目之歸也古之人所以設爲圖畫之法者豈非欲人見其所不見起敬起孝以固其良心者故是心一固則可以通天地而貫日月去菑害而召豐穀不可謂无也乙丑之歲七月己巳道士今狐壽椿來訪既而言曰壽椿入道之山有觀觀有壇壇有殿殿有三清玉皇上帝御容三境高真一一具備每季春之日百里內外若士若民奔走俯伏虔祈景貺靈効大著來者日益然異時道里或遠則人亦不能數數至也有志願而不能至是斯人之心常不滿也嚴且繪像使有志願者无奔走之勞而有瞻禮之益以滿其不滿之心壽椿竊有志焉願貧而无資子盍爲我一言某曰若万法皆爲也以僞爲亂不可以僞道善而終以獲福吾何尤哉人其忍辭之

捨佛額水精珠疏

九重淵底嘉祥初發於人間六丈身中妙相遂嚴於物外願此摩尼之有得本於象罔之无心是大因緣作真功德伏望昭明万法示現衆生圓照用時如鏡出匣白毫到處與月當天庶勝利之難窮俾寒門而獲慶凡此懇禱諸佛證知

置大藏經典疏

諸緣出世本緣說法利生衆生鈍根不能見性成佛所以託胎外濕化爲正命認地水火風爲自身將盲引盲從苦入苦大可厭患况无出期故如來敬豆以雷震法音示之以天然資路設有七宝布施滿恒河沙不如四句受持等虚空量而此小邑其中万家雖建梵宮猶虛龍藏醍醐上味至死不賞摩尼宝珠曠劫常棄豈不共生慙愧同作因緣今聞上国伽藍適有古教細帙題緘万卷價直千緡欲置六師殿堂不妨八部衛守普願聞見咸發慈悲大事

圓成諸方慶讚若僧若俗得誦得持十地一乘性陸運而不染三塗八難罪湯雪以无餘或素或緇曰男曰女不以多寡便為重輕惟能運喜捨則必獲法施福

置道藏經典疏

陳君幸

自廣成子修身千二百歲始為神仙家肘後之傳至柱下史著書八十一章遂與儒墨教鼎足而立吾道非感於天堂地獄斯文當秘之玉櫃芝函欲鎮名山須藏真典六七十人羽玉其如汗牛充棟何三方軸牙籤須仗傾困倒廩者

募入生日請僧誦金剛經疏

葛謙白

生我劬勞載遇誕弥之日俾尔昌熾必憑衆祐之功矧惟般若之靈筌寔冠脩多之寶藏是曰真語如語不誑語宜作悲觀慈觀清淨觀伏願若見若聞或道或俗流通法藏荷擔如來捐金不靳於涓埃植福可同於海岳雖三五而盈三五而缺了知幻化之須臾然八十為春八十為秋可觀壽期之綿邈

茅山鶴會鑄鍾疏

孫仲益

望中天之華表以迎遼鶴之歸建東序之金鍾而聽蒲牢之吼惟句曲洞列靈僊之籍寔嘉平臘著內紀之謠念久闕於鴻音當仰資於衆善百求百得聚千鎰之多而後成大扣大鳴徹九地之幽而皆應

化鑄鍾疏

佛身法身緣聲聞身而修證妙音梵音託世間音而闡揚眷惟龍藏之摠持寔賴鯨音而發越輒干檀信就此勝因椰標扣門蓋將萬鈞之工直蒲牢躍冶豈徒百里之見聞

辟支院緣化疏

辟支佛昔遊南土示現神通古道場今在東山嗣承香火頻年補發弊事若修惟三門滋歷於歲時而四壁弗支於風雨期鼎新於輪奐庸仰控於檀那倒廩傾囊儻幸片言之投合飛雲障日益嚴百里之瞻依

東禪化供疏

望州亭畔林木池沼皆演法音濯錦江頭鼓吹笙歌咸宣至理居士慣曾提掇上人只麼經行一毫端妙協機鋒尺大地春開筆舌潭空月皎也知應現无心文蔚鼓粥魚坐竟叢林增氣三山千簇寺而懶翁住處是大叢林一路八州軍而仙府雋流皆舊檀越不厭巧緣頻數良由願力洪深從上流傳于時紹述相逢相見未卒已自先知有始有終畢竟還它樂施

東禪化供疏

国一禪師云出家大丈夫事非將相之所能為誠哉是言從上先聖存心入道以至志軀為法捨全身而求半偈齊腰立雪斷臂安心豈不是欤何憚入鄽垂手化導有情不顧寒暑遠涉山川不拘山林城市酒肆茶坊米市魚行花衢柳巷或瞋或怒或唾或罵逆順門頭是非境界折伏慢懂誘掖一切不探虎穴安得虎子儻无力量豈能荷擔若能荷擔是名真止出家是為真法供養然後於

微塵裏轉大法輪向一毫端現玉王刹豈不見保壽和尚作街坊時於十字街頭一拳之下悟徹得恁麼无面目可謂快人一言快馬一鞭築着瞋着動地震天流落叢林清風宛尔敏上人出那伽定發廣大心笑持一鉢遠詣建水續舊目錄訪諸檀那求余法語求筆書民塵中撞着知音必能肯首滿意歸來供五千拍續佛慧命豈小補哉止庵當為汝擊手鼓升堂重說大義頌曰裴公龐公建溪上何用區區別處尋玉戶朱門相見處不勞重奉尺知音

東禪化供疏

吐月吞風寺在千巖万壑摩有接踵僧來四海五湖雖其人境爭高且要法食俱運惟一畝沙諸賢長者與真竟有大因緣莫厭頻來信是人惟求舊无辞博施管取道不虚行

東林化供疏

開蘭若門雖依佛住具伊蒲饌允賴能仁眷此叢林是雄上国持鉢而食豈无獅子兒獻宝而來必有長者子欲成大海要積涓流

雖法力无边自永周於沙界而因緣有地莫永庇於一方

觀音院化供疏

陳無已

化无高下一念徧於大千施有少多半果等於百億是憑念力用作妙音樂與信心同茲勝利

六祖院化供疏

黃魯直

鍾魚鼓板凝禪尺飽而六祖飢卧具床敷濁禪尺温而六祖冷使道人如此失所則檀越何處用心敢為諸仁略開小分相逢展手不妨貧者一錢隨喜轉頭報在龍華三會

趙法師化供疏

葛謙白

蔡明遠一校耳尚有平原之明陶胡奴何人哉不關東序之贈某早承道陰晚苦風淫人事頓乖齊薰得廢魚躍來燕之金粟虧粟里之瓶特傾持鉢之誠以觀指困之施敢望歸心贊極與念羽流豈无青精以助棗梨之腹不如梯裨可充荔枝菓之腸

汪道士化供疏

其結廬煙野寄迹道流煮石餐松未齊於逸駕吸風飲露尚隔於仙達必資稊稗之微以充口腹之養伏望見聞樂施道俗具憐輸會歸合於千箱起炊煙於破釜飯抄雲子儻鍾版之復鳴福比河沙諒飈車之有報

結龍華會疏

象教垂文肇自釋迦老子龍華法會證於弥勒天尊當知後世福田特在衆生心地是用廣哀淨賄普結勝緣今晨共樂人天他時同生佛土但得四千年常无退轉庶期八萬歲在處相逢伏望見聞各生歡喜

崇安寺放生疏

孫仲益

齊宣王哀一牛之費鍾无辜就死杜工部解衆雞之急縛不忍遭其故諸菩薩開方便門而大居士施无尺藏閱此衆生羽毛鱗甲之屬貸其一時網羅鼎俎之虞洋洋焉得其所哉幸有不驚不怖不畏之心嗚嗚乎不可尚已應獲无量无数无边之福

觀音道場設羅漢齋疏

李去病

剛柔緩急取舍辟就凡人各有趣舍如十指然不可牽抑或有持善因佛事者試為宣說纒屣首根生大敬信則符契昭合不差毫芒万人之心一人之心也万人趣念一人趣念也諦觀諦聽初无勞煩乘其威神所周廣大故以滋味為佛事者了滋味而舌得爽快以光明為佛事者見光明而目得昭徹以安適為佛事者就安適而身得自在以馨香為佛事者顯馨香而鼻得通達以聲音為佛事者聞聲音而耳得聰辯以懺悔為佛事者悟懺悔而意得解脫隨取隨求圓滿无量若水赴海殊塗同歸故今議以來春作觀音道場及羅漢齋一會如上所布俾眾生成證一切凡以諸種種身得度者各從所現身而聽說法刻十六大士位證四果識具六通曠劫住世有感斯應

禳字星設醮疏

歲運方艱言念扎瘡之苦星字為慧必資禳後之休助設微科瀆

憑善友異迎祥於九府俾集福於三元五几金壇許疑雲車之至南箕北斗增崇壽岳之隆願洒芳毫同成道果

化度牒疏

以財發身理固存於明訓見得思義士亦恥於苟求惟无愧於道心庶可干於仁里願發積中之厚積共成方外之勝緣儻聽蕪音幸回金諾

開利寺化度牒疏

孫仲益

大士營堅牢宝藏世尊開方便法門自惟浮生四大无常之身莫如歸命最上希有之法仰憑博施共結勝緣儻容此身度世依佛依僧敢忘它日捐軀報恩報德

化度牒疏

東坡

參寥行者鍾守素事參寥有年夫未嘗見過失僕嘗密察其所為似有意於慕高遠者寥云秦太虛有意為率交游間每人為出買詞部牒今得出家此亦善緣僕既隨喜然寥不喜干人故書此

紙以付素使遇善知識即出以示之隨意所辨即書於紙

化度牒疏

汪彦章

離爰出家期紹如來之種遇緣祝髮必資檀越之恩道思雖匪上
根蚤持淨戒久執道人之巾屨未陪衲子之鉢囊儻善知識之
垂悲憫比丘身而得度唯茲財施並言以法酬

化度牒疏

呂伯恭

香刹宝坊无人則廢梵容金像非眾疇依是知造寺之功不若度
僧之力敢持此說遍告諸賢續破闇之燈未貴豈岡之寸焰假幽
塵之翮須憑鴈背之一毛

化度牒疏

圓頂方袍名為僧相圓外方內號曰錢神要覓護身符止洎阿堵
物歷三河祗而登竟苑始自今朝興六波羅而開施門共成茲事

化度牒疏

趙莊叔

佛世云欲求寂滅樂當與李沙門法深山窮谷糲衣糲食務自枯槁此佛

之所以日夜教人也今之孝佛者則不然裸其顛方其袍變易其
姓名轉換其聲音形容不殊而佛法微矣僧希成顧謂某曰言作
彼相者幻也作是念者亦幻也冠襟而入宗廟莊欽不勉而至杖
屨而登瑩壠涕泗不期而至物固有變於外而遷於內者子以音
容之同不足以為佛獨不觀夫超往三界證上乘妙法有不自於
音容之同者乎某笑曰汝有欲哉希成曰童行道能從希成二十
年矣欲歸誠佛僧囊无餘資惟願慈悲為我等作語白諸大檀越
令我童行道能得隨佛出家某曰嗚呼道能而來前汝道能自從
无始以來焚諸名香至于今生自從今日有種二善因合受如是
報今諸大檀越聞汝出家生懽喜心各捨所有成殊勝事如吾之
窮无物可捨亦能為汝作言語明汝本心白諸大檀越今女受施
白從今日乃至汝身不須念佛念法念僧不須說戒說定說慧安
排道具淨洗鉢盂假使住世七十九年也受得許多布施乃至經
歷日千万劫且作未來因緣

披剃比丘尼疏

晁无咎

山河大地尚因瞪發而生血肉幻身豈是金剛之法為泡為幻為
无量腥臊聚為苦為惱為百一疾病纏為火宅已燒為丘井將墜
晝夜猖狂而不暇夜夢林湯而自驚無常大鬼之所驅有情更生
而何往所宜厭患出離而反欣喜控搏乃清淨童女童人賢公之
孫信士之子初聽結禱之議更萌落髮之誠至於是姑姨妹之行
譬若觀雀蚊蚋之過蓋戒定宿修於前世故因緣適會於此生親
杜姓中成從本起之願姑晁氏配為菩提彼剃之資解締著盤諸大
八部而皆歎登壇受具大覓六師而現前當有無舌瘖啞人教汝
讀經而生盲瞽填人指汝見性滋長聖種斷除愛根用以加持晁
杜兩族俱乘勝因回向幽明二途永脫苦趣及此會中盡未來際助
緣隨喜喜男子女人證明此比丘尼今得不退轉同悟无生忍那謨
佛陀邪

聖宋五百家播芳大全文粹卷第七十

聖宋名賢五百家播芳大全文粹卷第七十一

祝贊疏

祝聖

祝皇帝聖壽疏

真乘演法常開最上之因寶藏繙文能起无边之福敢助虔於覓
力庶增祉於皇圖 皇帝陛下伏願如日之升如山之固永享諸
天之隆長居八極之尊

祝皇帝聖壽疏

金僊建化坡第一之真乘玉偈演音集大千之妙利切慕華封之
祝虔依皇覓之文 皇帝伏願慧日普臨禪天畢覆永固南山之壽
長居北極之尊

祝皇帝聖壽疏

后作民之父母咸賴昌期臣視君如腹心敢忘報上恭依慧力仍
仰直琴係魏闕以馳神効華封而申祝伏願 皇帝陛下離明久

照乾健常行益眷命於聖神九州共貫永在躬之履數万壽无疆

祝太皇太后壽疏

玉相現前運能仁於普界金文演義道真諦於羣迷敢崇輯於妙因庶助緣於遐曆 太皇太后伏願如慈雲之靡不覆如慧燭之靡不輝常居長樂之尊永修大任之德

祝太皇太后壽疏

寶覺現前示能仁之慧力金輪秘藏宣真諦之密音恭憑最上之緣仰薦延鴻之筭 太皇太后伏願慈如雲之永蔭福如地之無疆長居慈闈之尊日致聖孫之養

祝皇太后壽疏

佛趣導迷慧力周於法界母儀正位陰教及於函生虔依蓮界之祠大放海輪之藏庶崇勝果仰薦慈仁 皇太后伏願壽若靈平山之高福如厚地之固常親承於帝養永同祚於邦圖

祝皇后壽疏

演祇園之教悟夙智於本來繙貝葉之文資真善音而普覓虔依梵界祈右皇圖 皇后伏願北極齊尊詣天宮護流景光而配日崇厚德以儀坤

生日

師相生日功德疏

元輔挺生應五百年之間世真皇調御懋一千歲之昌期仰假道勳上崇鈞筭與山河而共固配箕翼以長存庶使生靈永有依賴共推大道證明

張徽猷生日功德疏

桑弧絢采顯逢申伯之生貝葉摛華不替魯侯之壽共惟 知府徽猷為仁由己以道得民名在西清本奕世公侯之闕閱政成南國皆傳家詩禮之典刑候適素秋祥開黃髮王臣一節永扶有道之朝佛氏三乘弥介无邊之福紺谷易格丹烟難窮

楊殿前生日功德疏

洪炉老火陶上將之精神遙闕高真輔吉人之祿筭式逢誕日恭
集道流啓祕典於瑤函祝遐齡於金錄坂二至教能廣慶於人天
業二高勳庶永齊於箕翼

代僧爲丞相生日設齋功德疏

去麟閣之儀容既勤繪事演鷲峯之古義用集殊因恭惟 某
人道貫天人孝超今古開物成務効已克彰尊主庇民功无與二
當泳游於竟海力衛護於正乘惟大悲之道場實成都之福地向
緣睽奏遂得賜名公久以焚修親被恩澤絲綸降寵香火增輝是
用嚴金碧於層樓炳丹青於粉堵歸依寧替瞻仰无窮伏願密契
直空普薰妙善躋胖心廣類廣成子之不衰名遂功成似魯僖公
之難老坐陪熙運永替皇猷

張知省生日功德疏

金風玉露陶成物表之精神象軸琅函密替人間之壽考至誠所
感純嘏是臻既禪肺腑於彤庭且益年齡於丹籍柏觴薦處映南
極以增輝檀篆浮時拱北辰而共永

漕使生辰功德疏

計敏夫

嵩嶽生賢以贊承平之運鷲峯闡教少伸集福之緣共惟 某官
奉際天人志存君父榮方持於漕節慶適值於門弧常此令辰屬
城慶禱式憑貝典用祝椿齡伏願密印嚴持普燈交照保形愈固
類廣成子之不衰作得長新如魯僖公之難老

太守生辰功德疏

崧岳儲休寔生賢佐鷲峯布教允佐吉人當誕月之令辰哀屬城
之歡禱版依檀像演諷貝文伏願 某官道氣愈新如蓮不染德
容難老似柏長榮副睿聖之乞言荷朝廷之圖舊

知縣生日功德疏

吉人爲善通于神明皇天無親俾爾戩穀啓三島不刊之典當一
同難偶之期恭惟 某官士氣昂霄仙風絕俗非礼勿視日嚴北
極之秘文以仁存心時舉南邦之異政峻秩早聯於紫府佳辰適

遇於青春爰諷銀題仰千金闕運而無所積新事業於熙朝取之不可窮永壽康於坦履丹誠懇禱碧落昭臨

大碩人生日功德疏

與佛有緣生後如來之一日自天降祐身逢皇宋之七朝既涉世途寧逃業障况以鶴髮耆頤之齒久居鰥嶼瘴癘之區寢食難調拍顧生疾於陰功之有助始人力之難支奚罄丹悰仰啟皇資假慈悲之願力作方便之法門滌罪垢於六塵災消雪霰壯福基於甚善壽保椿松

功德疏

修造

佛事

修聖祖殿成疏

天體蓋高神心莫測輒干洪造上布丹誠臣昔叩靈祠恭陳祀事念棟楹之既久頤殿陞之未崇敢肆經營精加興建造成峻宇仰奉眸容嚴寶構之清宮駐霓旌之仙馭臣夙依道蔭不忘報稱之心永慕真詮敢怠修崇之禮

興國寺佛殿畢工道場疏

王 坡公

祇園之勝寶飾初成釋迦分身遍滿空界蓮華啓藏交誦諦文起一念之至緣導十方之迷識永依慈力廣輯圓音

發願修水陸疏

東坡

苦海彌天佛為彼岸業風鼓浪法是慈航諸佛子等又墮三塗備嘗百苦不遇善友永無出期今者各於佛前同發此願願除無始已來貪嗔惡業願發今日已後清淨善心願行行坐坐歸依佛歸依法歸依僧願世世生生遠離財遠離色既獲生涼之樂同躋極樂之方普冀有緣皆證無漏

簡州道俗齋方僧疏

黃 魯直

續如來末劫之壽莫大乎法供養乞上方香積之餘不可以意分別崇成三德六味普飯十方衆僧貧女一錢不以為少給孤側布不以為多知恩方解報恩辨心即是辨供我輩生於五濁不遇三災鑿井耕田當知雨露之力仰父俯子實依桃李之陰年且稟豐

人有餘力興茲美報式契羣心伏願 皇帝陛下福基堅固如不動妙高之山德澤汪洋等甚大功德之海兩宮同壽箕翼衆星常拱太微河出九疇山呼萬歲乃至麟符虎節千騎二車下為動植之春上協太平之業凡我此會不勸而成若見若聞隨力隨分

觀音道場疏語

李仁甫

是觀非觀如水底月是音非音如合中聲自一月二月至無邊月觀之者當自己心雖妙聲梵聲及說法聲聽之者不從他是故我今心田一念專精耳根諸塵斷滅伏願觀世音菩薩廣上中下三乘之教化千百億無量之身滌其罪垢罪自冰釋植以福田福如川至副大覺明明之付囑滿衆生種種之願文

設觀音供疏

劉中遠

身是道易心為佛土惟身安而道泰則心淨而佛來伏念某幼而愚迷莫曉操修之懿晚復衰病尚懷顛越之憂仰願慈悲俯垂護念甲正辛年而壽考無進德於其途

設供疏

楞嚴會上雖已證於圓通菩薩戒中亦嘗開於懺悔以衆生之宿業致諸佛之興慈謹指仁祠恭依梵律伏願示大悲憫念多劫之塵勞放普光明度一切之苦厄長在清夷之處遠離怖畏之災心貫十方罪無實相業通三世懺有明文敬仰威容式修淨供伏願慈航濟難法炬開明庶幾有相之身永除無妄之疾一門皆吉諸福大來誓修精進之因期證圓通之果

祈福道場請長老升堂疏

竊聞昔妙應菩薩迺再世之辟支今長老禪師實後身之圓智傳心一印利物同符以無等慈悲設無盡誓願說無上法要度無邊衆生况某也持金剛誦般若破四相誦一乘雖見如來無上等根性疑與善現是一會中人妙諦儻聞道途頓免

看誦華嚴經疏

因緣契合得有此經慶幸平生孰如今日實身貧而家富將口誦

而心通並蓋此生敬恭不怠在在處處如佛之春劫劫生生以今為始伏願諸佛所說如慶喜而常聞一生之間與善財而同證

懇普賢菩薩示現疏

王望之

峨眉異境普賢道場顯殊勝之妙光救昏迷之末俗凡茲瞻禮無間賢愚聖赴感以示慈人因相而生悟其等願心雖篤宿障未除逮此來遊起於一念初登山而兩作既升頂之煙迷險路八十四盤已驚破膽白毫數百千丈未見示人恭惟普賢菩薩大士現如幻身具大慈性掃重雲之陰冷階白日之光明使我同來之人得畢此生之願並茲以往永依上乘無任虔懇之至

佛母孔雀菩薩疏

毒龍盡而釋迦出世乾坤還清泰之風未劫終而彌勒下生日月垂貞明之象靜觀宿命切悲宗共惟我佛母孔雀明王大菩薩薄伽梵身獨露三界爍迦羅眼普照十方凡屬含靈業深復育至使神月頓還舊官維有區命莫報恩等再生感深弟就鳥峯誥別坐擎天上之春回象嶺言歸又是人間之夢覺

懺經疏

東坡

如來大藏起於四十二章過去妙心流出萬五千卷前言具在後句分明縱有古佛六通難轉老婆一卷念我夙昔見自本源悟萬善之同歸豈一法之敢捨徧參重譯盡發秘函全見摩尼珠采證貝多葉作此大事示諸有情誓首雙林之輪不負二聖之唱

迎羅漢疏

寂滅為樂清淨自居見如來於四弘願中起神變於一刹那頃展坐具之一角地狹山摧浮拄杖於橫流紋歸浪改眉毛椶地拍燄際天飼瑞鵲而一物等觀洒甘露而眾生蒙潤董修精進虎為馳經諷誦勤渠柱專飄席或札薄伽梵或入般涅槃呼吸而雷掣風生噫欠而雲興霧合離諸者外持一鉢以何求住在無為徧右肩而常袒支頤自逸隱几忘言靈山之鹿每嚼花寶海之神端獻供針峯甚峻真坐有餘芥子雖微納山不礙

放生疏

天地闢而聖人生中天麗日飛潛蘇而王澤洽寰海歸仁是資爾
屬之性靈以祝吾君之眉壽或逢誕節爰奉壽草虫魚各遂其
生廣唐虞好生之德葵藿皆傾所向蒼蒼翼有永之年

放生文

黃泰之

汝剛足以自衛智足以自晦而乃見獲於徒搏之夫人喜汝以八
珍吾憐汝以一死捐百金以市汝而復納汝於清冷之居汝其益
志於晦用保厥剛以無速於矣也夫

轉經藏疏

最上貝文其深花藏具大法眼是真道樞惟運轉之無窮實歸依
之有在圓機應物動化於一時善利循環幸密於多福

福應廟乞加爵化緣疏

漢令有神舒民無斃將益隆於廟食用不集於簞金翠琰龜跌秘
十行之温詔寶翰戩軸來九命之真封茲事不凡吾人何吝

祈禳

賽謝

設供禳災集福疏

蘇子瞻

躬儉節用本嚴房闈之風遺大投艱猥當廟社之寄常恐德之弗
類以召災于厥身敢即仁祠肆陳淨供恭延梵釋普施人天俾壽
而康非獨輔安於寡昧與民同利固將燕及於華夷仰冀能仁由
垂昭監

畫羅漢慶讚設齋祈保疏

某方釋大憂初起重疾恐殘年之不遂念末緒之未傳惟阿羅漢
之慈悲受釋迦文之付囑有求必應無感不通爰有異人是名禪
月畫此天日之表應於夢寐之中若有物以護持俾凡生而瞻仰
某逝高妻妾歸依父師三世之業可消百生之冤自解仰憑至鑒
俯覓微誠危涕交垂占辭未盡

華嚴會禳災疏

陳履常

毗盧遮那徧一切處惟佛所在名常寂光闡妙法於三乘繹微言

於九會圓翻万得頓超有作之思惟含吐十方盡攝無邊之刹境
以此發心則心地冥符於諸佛以此修善則善願皆服於衆魔比
者邊候繹騷民墨震擾忠衛社稷誰傾漆室之憂力守封疆莫備
形門之役廼合誼於衆志俾同結於淨緣仰瞿曇清淨之身起華
藏莊嚴之觀吉蠲蕪藻眠滌壇場五體投誠六時行道百千万偈
如聽普賢之宣揚五十三城悉備善財之游歷庶導迎於景貺一
消弭於妖氛今則法事既周善功斯立仰願寰區安乂再觀河洛
之清畧緯宣明共仰璿璣之正烽燧靡發於幽障歌謠載穆於東
衢萬壽無邊一人有慶次願此方境內合道場人咸罄悃誠各霑
福利一曰壽二曰富惠我無疆天生時地生財勤則不匱五風十
雨而氣序悉臻於調豫千倉万箱而貨儲常保於豐易易物無害生
家有餘慶四恩三有法界含情咸茂功德之林同泛福聚之海

六祖塔下禳災疏

東坡

竄流嶺海前後七年契闊死生喪亡九口以前世罪業應墮惡道
故一生憂患常倍他人今茲北還粗有生望伏願六祖普齋真空
大鑒禪主示大慈愍出普光明憐幼穉之何辜除其疾恙念餘年
之無幾賜與安閑某敢不自求本心永離諸障期成道果以報佛恩

遠任祈福設供疏

李知幾

荷國寬恩有周歲二萬里之往復奉親遠役負全家三十口之生
成凜然性命之憂厚矣髮膚之託仰資仙蔭聊課齋功伏願終惠
長塗蚤瞻先隴温二江瘴掃疫癘以潛消節二風灘戢波濤而無
從伏惟佛慈證知

禱病道場疏

宋子京

聖寬流慈神華蒙護比緣椒極偶爽至和亟進匕丹未臻良已或
慮晦明失展休王交期乘沴致愆直辰為厄惟招穰之有典非妙
湛而罔依已即堵波偏探句偈延供十方之勝被除六疾之微指
日有瘳介祥無量益光惠命祗飭齋誠

祈嗣道場疏

史天秩

孫又生兒乃有移山之志老而無子難志濟壑之憂輒伸一念之誠仰扣九閔之邃某四世而下一子相傳積累之澤不流嗣續之微如縷顧惟及陋實忝繼承雖憑祖考之休尚冀子孫之聚奉先思孝敬鬼神達旦炷香望高禱而致禱迎春剪綵詣聖母以投誠久傾葵藿之心未感熊羆之夢方炎帝執衡之候乃双親設悅之辰按大藏之古儀建圓通之勝會庶憑佛力上達宸聰伏惟帝釋天主道濟洪纖得包罔極生殖長養曲成而不遺主張維綱善救而無棄特回昭鑒俯納虔誠一毫之片善可書三載之餘殃如掃策登九寸遇老嫗之授符環列四枚感黃衣之獻玉庶幾多子得以興宗誓勤陰德之修用答大鈞之賜

設羅漢供祈安疏

韓子蒼

菩薩應緣之號有長壽王聲聞利物之深唯阿羅漢肅依禪眾仰即真修伏願眷屬康寧子孫昌盛清淨少惱常居福德之鄉安樂延年重觀昇平之世

為妻禱病懺經疏

韓子蒼

眾生困苦皆是宿因諸佛憫憐普加慈護惟華嚴之妙典示法力之融通不可思議具如傳記伏念妻柳氏本明養生無術嬰疾有年欲銷多劫之愆須仗一乘之教願垂密祐早獲康寧使寒疾風虛悉離身而遠去凡湯劑丸散咸應口以如神乃既闔家並蒙百福

祈嗣賽謝道場疏

神威不測蚤回從欲之仁佛力無邊願效知恩之報曩緣賤息亟恩賢侯曾日月之夫淹俄能罷之協吉祭然蘭蔭既回宇戶之春籍甚具爰謹栢庭之薦惟聰明之嚮與庶壽祿以時升

謝登第設羅漢齋疏

史天秩

天道雖遠其聽甚卑神居無方有求必應輒具頻繁之供仰甲葵藿之心伏念某寒淺孤生棲遲晚景此緣鄉幸例試省闈愁入危湯懼脫奏名之籍夢還私室忽瞻生世之顏致令失且之窮獲預

圖南之幸尋思奈倖出自冥扶方仲春驚蟄之辰值真宰降生之日勉陳清供遠迓仙風伏冀大士監觀列真垂睭掃一生滯迹關萬里前程仕路亨通壽筭綿遠

還家賽謝設觀音齋疏

史天秩

某兄弟日者艱難遠役往返畏途覆語盈朝大仇塞路孤跡共知於不免危腸獨保於无他仰惟佛菩薩之明俯察賢不肖之實默然有禱恍若可通无罪以書有枉遂直敢伸淨供少報殊私伏願公名宮有來疾病良已公議盡出毀言不聞全家安乎山林餘蔭均乎嬰孺悉除三世之業永忘一至之心敢冀大恩俯垂至鑒

為子謝安設供疏

韓子蒼

衆生困苦之中但知呼佛諸聖慈悲之故常善救人昨以二子同時一春卧病既不勝於憂惻輒仰叩於真乘聃耳梵容嘗形夢寐揚枝法雨坐獲清涼敢具伊蒲肅延飛錫伏願遵如來之誨飭作蜀世之依歸靡辭赴感之勞常與闔家之福

為子謝安設供疏

韓子蒼

衆生願力无感不通古佛慈心遇緣皆應能令執惱盡悉清凉須以兒曹偶離疾厄不勝父子之愛仰叩人天之師既獲痊安敢志報謝伏願光明照了威德護持壯老康寧孩童壽福仰惟妙奩俯鑒微誠

為女謝安道場疏

邵公濟

疾痛號呼於天煩惱根性自佛惟普施大士之至聖與閻浮衆生而有緣念弱女之疾甚危極常醫之技以拯默存善禱陰有神通夙按規儀敢志報謝當更務於脩省冀益加於護持闔此衰門共臻殊祉

懷水疏

宋子京

比以積雨過常伏陰為沴失於潤下遠此橫流南屬豫徐北綿河朔墊傷廬舍毀決防庸大田之稼其空比屋之農胥歎雖天災代有或繫於機祥而寡德使然敢志於暢厲亟詢梵典祇結禮壇即

秘宇之神深集勝流而圍仰被除金界宣震潮音庶憑護世之慈
垂濟薦瘥之困浸紆厄會回納太和促歸壑之有期俾服田之就
緒能仁普鑒大庇云依

穰水疏

趙一莊叔

平原出水皆緣吏治之失中小民无知尚幸佛慈之加閔敬修淨
供齋奉真乘惟潼涪千里之邦帶東南二水之阻漲不時落地無
子遺乃者暴雨連陰悍湍四决惟鬼神虐用其罰起尋丈於斯頃
之間而民吏不奠厥居寄性命於毫髮之上是用頓首皈命聲音
求哀願虔終夕之香燈全護一城之生齒仰惟觀音大菩薩廣大
不念罪慈悲不違人重雲歸山漲水返壑吏民免魚鼈之食父老
覓子孫之憂大德難名大恩難報今者分飭屬吏各洗厥心非佛
疇依既免向隅之泣以民為急不忘在莒之危誓守丹衷仰酬法力

水後穰謝疏

李樂靜

我佛開方便門施智慧力哀衆生如窮于假大願為慈航比者暴
潦淹旬川流漲野駭孤城而若塊憂庶類於其魚惟是熙寧之間
將罹昏墊之患威神一扣潏潦四空再瀝丹衷上千靈鑒惟願散
白毫於頂上盡逐頑陰吞巨浸於毛端坐成沃野永賴揔持之賜
益堅回嚮之心

淨獄

淨獄疏

陳無已

幽園空虛實作太平之象法筵崇飾聿修典禮之常惟此除邦素
稱劇郡獄無虛日市不絕刑解網施仁奉 聖朝之初政治絲從
理資賢守之良能造此空虛敢忘夫報伏願刑設弗用人自不冤熙
熙如登春臺濯濯鞠為秋草更憑梵力溥及含生

淨獄疏

蘇子瞻

民知榮辱自銷五福之疵政格平和遂絕一人之獄今者國家閑
暇囹圄空虛雖咸仰於帝仁亦陰資於神聽是用集祗園衆大啓
法筵蕩滌餘分援升宿滯此則妙音普贊勝果天圓振九泉冤枉

之魂作萬古清涼之地門生茂草氣實太和歲常獲於豐登民承蹟於仁壽

淨獄疏

陳履常

道與乎世民格于中不犯有司蓋習是知非而致此必使無訟豈承流宣化以能然誰其尸之神所勞矣肆嚴法席恭薦茲容刑清政平已荷能仁之賜日來月往益堅欲報之心

淨獄疏

朝廷尊道縣邑嚮風民有悛心但識耕桑之美庭无留訟遂多扞獄之虛治雖責於承宣恩實歸於覆壽敢羞微礼上瀆屈霄刑清政平已荷无為之化家給人足更資不宰之功仰鴻造以難酬與羣生而共慶

祈禱疏

祈雨 謝雨 祈晴 謝晴 祈雪 謝雪

祈雨疏

李樂助

稼事方興時澤不足既濫承流之責且先闔境之憂敢露精衷上干慈聖伏願法雲遍覆神力摠持遂興三日之霖少蘇千里之旱仰惟慧照俯徇哀祈

祈雨疏

播茲多稼期于有秋雨澤愆期農夫失望儻陰功之不與在人力以何能爰竭丹衷仰叨洪造尚憑願力以惠嘉生

祈雨疏

慧雲垂潤本無間於羣生旱氣為妖慮有傷於百穀輒殫凡懇上叩佛仁仰冀慈悲俯憐枯槁甘露一洒各蒙生長之恩豐年可期共樂和平之化

祈雨疏

林豈塵

如暎如焚正渴雲霓之望是穰是藎久罹旱暵之虞祈求既竭於忱恂惠澤未蒙於霑足敢邀仙馭來慰民情况山川有蓄泄之靈而田畝正後蘇之望伏願油然作沛然下遂成三日以為霖陰无伏陽无愆米聞四月之不雨庶少寬於吏責使不失於農時

祈雨疏

龍見而雲散旱為虐原隰之田未備播種井汲之泉幾涸源流恐
宣化之澤未及周乎使致和之祥有至垂矣輒輸誠悃仰禱慈悲
伏願風淒淒雨祈祈不失三時之務苗芄稷穰疑式寬千里之
憂

祈雨疏

惟茲穡事長楸於夏弥月不雨農人告病惟神血食此方與守土
之吏同任其責如能大赫厥靈以澤羣生不惟解民之憂寬吏之
責亦可以彰神之休

祈雨疏

金風扇德品彙收功火日揚暉歷旬不雨澤既愆於久望功將壞
於垂成俯竭丹衷仰叨洪造陰功嘿相美利曲成用濟羣生式貽
靈貺

祈雨疏

神心莫測天監甚昭有感斯通善祈必報仰瀆蓋高之聽輒傾小
已之誠顧此疲民苻逢凶歲人才憔悴帝亦哀矜當嘉穀之蔚具
困常暘而欲槁稍愆雨候將致年饑是用式謹明科恭趨真宇惟
天威之洞照察臣志之精求濟以豐年錫之甘澤仰冀曲成之賜
普霑善貸之恩

祈雨疏

慈悲救物立願弘深方便濟人運心廣大儻竭至誠之懇必彰善
應之功當時雨之屢愆念秋苗之將槁驕陽未殄旱氣方隆是用
恭歎梵宮嚴修淨供伏願慧雲遍施法雨普霑濟以豐年錫之甘
澤仰冀無邊之力俯成善貸之私

謝雨疏

李樂靜

廣願不違至神能速梵磬鏘而震雷作準香散而蒸雲只一夕霑
濡千里膏沃輒伸精懇上報法慈誓堅回嚮之心永賴函蒙之福

謝雨疏

兩賜失節民吏其憂方上有祈先期是應精神所格在菲德以何堪動植皆蘇惟大恩之莫報輒將卑懇以謝无私

謝雨疏

以雨為命南畝之民膏澤不時歲事何望將率僚屬有請于神密意潛通願答如響咸生比日遂厥功茂焉祇奠祠庭以謝靈貺

謝雨疏

文士頌

時丁旱暵方增耗斲之虞佛示慈悲曲應精誠之感膏澤一沛槁苗再生民有望於豐登國何憂於儲蓄恩波廣被法力難思益推利濟之仁永息蘊隆之害

祈晴疏

天作淫雨將中敗於西成民有肅心敢上干於北極念扞邊之師既力若調兵之食方勤必大積於廩困庶少寬於州縣願馳日馭亟屏龍工開昱晝晝夜之輝式蘇萬物發如坻如京之詠爰快三農惟帝降衷於人歸命

祈晴疏

佛以度物為心食乃生民之命比者時陽不固暑雨既淫大貽南畝之憂將失西成之望仰伸誠祝上扣法慈惟願放白毫光如一念頃被頑陰於四極瑩麗日於九霄永賴庇存益堅回向

祈晴疏

秋方登稔平鋪萬畝之雲時適歛收綿作弥旬之雨墮農功之垂就殞民心於載憂謹瀝丹誠仰投皇覲願幹回天之力潛施馭日之功函掃妖氛廓開霽色耕而不穫念茲終歲之勤得之則生保此有年之喜

祈晴疏

文士頌

積陰作沍潤茲常雨之愆新穀未登懼失有秋之望敢殫凡懇仰扣蒼皇惟溥示於能仁遠邇開於急照清風四起白日正中農畝既收軍餉无闕吏獲逃於曠責民咸樂於豐年

祈晴疏

秋日凄凄亟偶為霖之害我忝與二莫輸是獲之勤惟軍食之攸
資豈農功之可後仰祈佛慧曲贊天陽起眉間一毫之光羣陰咸
伏來郊外千箱之積百室用寧法力無邊凡情有賴

謝晴疏

秋霖敗獲仰二諦以興哀佛日當空肅羣陰而退聽敢罄歸誠之
礼用酬從欲之仁風雨攸除已不承於法力婦子寧止更卒享於
豐年

謝晴疏

李樂靜

佛果難量法門无礙天龍入捩持地水火風一歸变现託
化身于千劫拔苦道於眾生恭惟靈惠大師位證真乘功深願海
自有唐開元之際夙種妙緣由先帝熙寧已來屢開靈感一方
受賜萬目同瞻比者雨潦因仍河流漲溢蛙鳴新甕十日不炊槎
擁戍樓四郊如海已危生于朝菌將葬骨于湖魚屢瀝丹衷累通
玄整感神所應影響不違軒巨浸以東傾破重陰于一指天青日

白鶴鳴爭飛野闊天平牛羊可數凡在含生之類共蒙再造之恩
是用祗率屬僚肅陳淨供誓殫真信上報深慈惟願遍福德於未
來廣津梁于不倦使四時調序百穀滋豐少完瘡痍之餘永賴生
成之賜

謝晴疏

歛藏在候縣為霖雨之災齋沐致誠虔以辨香之禱以爾農之勤
苦見我佛之慈悲取墜景於虞泉飛祥光於若木是刈是穫亟如
寇盜之空載笑載言永保室家之慶深仰無窮之惠空懷莫報之恩

謝晴疏

害霖盛而作霖雨方以為憂披雲霧而覩青天醫誰之力賴我言
薩現大神通憫此眾生罹茲火障頓息常陰之罰用成大有之年
以惠農工少寬吏責一心奉請已昭能應之誠誓首皈依難論無
窮之報

謝晴疏

近以霖湯為災盛陰積晦消敷素誦叩慈仁果膺六度之虛尋
殍三農之患既垂真蔭爰舉梵儀彌慶皈依庶申謝答

祈雪疏

李樂靜

佛果妙圓法力平等雖無求而不獲須有感而後通敢竭精衷上
干慈照比者冬陰不固時雪既愆幾成焦旱之災竊慮疾疫之變
伏願不違本誓力度有情俯為三日之期遍蒙一尺之瑞永堅回
嚮益勵齋嚴

謝雪疏

一雪應祈初無所報三春謹始預有所斬爰取時日之良載選池
亭之勝肅嚴供具繼設灯輪彼眾有情咸至道場之上此光無盡
普輝法界之中庶仗妙因可哀勝果伏願大宋世界汝州管下時
人安樂歲事豐穰同發道心各登佛地然後十方国土一切靈祇
雖各有緣等同斯願恭惟三寶印知眾聖歆鑒

聖宋名賢五百家播芳大全文粹卷第七十一

疏

追薦

祖父忌辰道場疏

黃魯直

昔嘗逮事荷莫報之劬勞今屬諱辰未志哀於冥漠式陳淨供少
助善緣恭對皇覺表白

祖父忌辰齋僧疏

葛謙白

業鍾黑白各招果報之殊供及緇黃必獲超升之福仰憑二教追
泐一靈先公特進伏願頓悟上乘長棲道蔭法空五蘊譴罷三
官聞圓音於五毫之前受秘錄於瓊章之上佛土三千界親禮卅
雄玉京十二樓徧遊僊境

祖母忌辰道場疏

朝夕寢門雖不逮事綢繆牖戶無我後生適當屬續之辰深動降
霜之感敬依梵殺延飯眾僧冀此妙因僅為冥助

祖母忌辰道場疏

昔嘗逮事早纏風樹之悲尚憶分甘莫致冰魚之養式逢諱日更切哀誠爰集苾芻之僧躬設伊蒲之饌冀憑慈力仰助超升伏願不昧本來承茲法施

祖母忌辰道場疏

瓜瓞有初簡在夫人之德風枝不靜實惟先君之恩爰厲諱辰式追冥福恭惟大覺證知

薦考君設水陸疏

如來觀曠野之神嘗懷悲濟之念慶喜見面然之士遂開拯技之科三檀之施既泊於廣筵十習之愆必消於幽趣先考特進遠辞昭代奄屆小祥痛惟罔極之恩爰設無遮之會歸依薩婆若廣誦脩多羅以伽陀之會而施苾芻多之倫以蘇摩之灯而燭睽魔羅之界恩霑有頂法被無邊庶仗薦嚴上資英爽先考特進伏願得柔順忍具智證通罪垢消除如風中之沙聚性真明悟若掌上之菴魔以五根五力之殊因證三耶三苦之妙覺

薦考君懺大藏經疏

如來四十九年慈每具於五濁大藏五千餘卷法備演於三乘惟炎漢初譯於摩騰洎大唐廣翻於玄奘道宏震旦教接迦維釐為經律論之文大滅貪嗔癡之毒魔軍敗北信士指南皎如暗世之灯明濟若巨川之船棧某纏哀陟岵歸命世雄爰親閱於琅函君面承於金口願憑妙利式薦尊靈先考特進伏願絕邪見之稠林離三有之窟宅蠲除業障報障煩惱障安住業根信根精進根觀史天中速觀九廊之院安養國內坐臨七寶之池

皇考朝請忌辰道場疏

黃魯直

二親之年如白駒之馳過隙百身以報如一滴之益滄溟罔極之恩永思其痛式當諱日恭設妙因僅承不二之音咸開頓覺之路仰惟功德證知

薦考君書維摩楞伽金光明觀世音經疏

天乘梵乘欲頓超於法界筆施墨施可追助於具塗而况談盡不盡於毗耶之城說俱不俱於楞迦之嶺信相演偈於金鼓無盡施法於寶珠皆為法藏之祕文實亦如來之了義虔書梵皮獲福河沙先考特進伏願避六賊之林射四諦之的絕攀緣於驕幢幻藥期超度於法棧慈航正語止業之道支速能證入無量無邊之佛土自在超升

薦考君道場疏

禮制有盡喪畢三年思慕無窮血露九地昊天罔極夫復何言恭聞諸佛示慈悲心行方便路曾開万字慈悲度四生不以禮薄不足以藹馨香不以人微不足以感高厚憫茲荼毒與作津梁儻使滯魄凝魂得乘威光慧力回向初地不入塵流某也雖不能謝德於無私亦安敢忘情於不報

薦考君懺寶積經疏

葛謙白

加文千百億身維玉毫之莫觀寶積四十九會皆金口之所宣爰歸命於空境身親披於袈裟具資法力而拯幽塗先考待帝伏願斷有漏緣破無明闇滅障如風中沙聚見性如掌上菴摩觀如來微笑之光滅多生習氣之重為尊為上為妙永依三耶菩提作舍作救作歸即詣一生補處

薦考君大祥道場疏

邵公濟

元身已歿悵奄及於祥除令名益新既再蒙於褒贈永念怙恃之德不酬覆載之恩惟茲勝峯近臨大墓祥光所燭吉地可通躬即仁祠夙修淨供近痛无父之國舊悲見母之哀念孤苦之餘生宜委頓之末路未先大馬空難鳳麟追思先君子之平生當憑大菩薩之至鑿庶冥福之可薦竭危懇之甚哀

薦考君飯僧疏

人生易失俄經六七之光陰佛慧難窮願照三千之世界庶令英鬼徑達上方恭惟先考通直才富班揚孝追孔孟蚤飛鸚表即馳譽於儒林晚奮鵬圖遂升華於仕版潔己以進直道而行不為

矯拂以沽名獨秉公忠而報國一司邑尉宿姦皆逾境而去之四
領縣章遠民有負子而至者治声籍甚士論藹然俄均逸於嵩山
姑養高於淮甸放懷詩酒方陪蓮社之清遊脫徒形骸忽起蓬山
之歸與念壽考本無足恨願追慕獨不能堪用傾欲報之情仰薦
無生之福其恩深鍾愛義急傳家處帝孝者兩年安希曾子之三
釜距親闈者千里久替荷蕃之一歸既享晨昏視膳之心更廢疾
病嘗藥之禮竟作終天之別徒增叩地之悲幸如來是真皈依使
過去得大饒益雖善人何必多懺而哀懇由茲少伸伏願 先考
通直乘此妙緣悟諸无相蓮花不着水長解脫於九幽明鏡亦非
臺自圓成於一性斯謂不亡之壽式覓罔極之思

皇考忌辰水陸疏

三塗苦海由一念以沉淪千聖覺航極羣迷而濟度蓋死生之大
變隨罪福之所招故孝子慈孫捐百身而莫贖非利根上智墮乘
惡以何知惟我先人早探真諦高明不乱琅然易筮之言實慈无
邪允矣齋心之力光陰迅駛諱日海臨願孺慕之如新痛仙遊之
愈遠爰修淨供普薦含靈百九土之波翻積十年之雲擾或被堅
執銳筋力斃於封陞或斬將拳旗骨肉膏於原野孤忠莫白幽魄
誰依矧荒歉之相仍致流離之不保赤子弃置於道路豈無惻隱
之仁白首枕藉於溝渠寧有蓋藏之望願依祕印來赴梵筵澡沐
壞軀歸投正法從無始之多劫息饑火之貪癡悟有生之皆空廓
冤心於平等速資懺拔永斷攀緣仗先君為導師亟趨堯率與諸
人為善友同證菩提雖所求者奢而所持之至狹將所格者廣是
所恃之至誠集此無邊之妙因少酬罔極之隆施仰祈大覺俯賜
證明

先妣忌辰道場疏

黃魯直

天地罔極初無報德之階日月不來每深濡露之感屬當諱日更
切哀摧爰以佛香普薰僧飯維九冥寂寞而積善之慶在心推諸
佛慈哀則正竟之門有路伏惟萬德俯賜證知

薦母設齋道場疏

拔邪歸正回苦作甘援汨沒於濁流變清涼於惱地是諸佛之洪願也鎬膚戴德擢髮數因感天棘之甚勞嘆我之用報是人子之哀情也職居中饋業墮浮生况茲有漏之軀動是無明之境則母親生之日也求免愆尤肅羞蘋薦欲求懺悔祇啓具文資十善之津梁破三塗之苦惱則母親今之死也以諸佛之洪誓憫人子之哀情知生日之愆尤知死後之懺悔歷陳血懇仰瀆聖知

請佛心和尚為亡妣說法疏

孤子某今日襄事啟靈石山佛心大和尚升法坐為亡妣說一句偈言使幽冥有知得親覩佛面承佛音旨是其所以為人子者報答親生之萬一也

中元薦考妣道場疏

毛伯穎

生我劬勞罔極之恩曷報惟天陰騭予善之理弗渝故我佛以入俗利生之慈垂奉先追遠之教當眾生休夏之日寔禮典嘗秋之時霜露既濡幽壙永慕蘋蘩可薦昭事如存以真常微妙之文濟解脫超升之路恪遵梵典恭設齋祠上以莊嚴諸聖於十方下以津濟含生於六道庶憑願力追遠先靈伏冀內外宗親祖祢昭穆受生樂國咸知先佛之言餘慶流宗永錫後昆之祉

薦母設羅漢齋疏

李去病

不忘付囑有大因緣廓六通之神悉知悉見出三昧之定來赴來臨為我母之導師登諸佛之補處下覃眷屬咸契願心

孟蘭盆薦考妣疏

葛謙白

日月其徂永動劬勞之感霜露既降難忘悽愴之心輒緣自恣之辰虔啓解懸之會以酥酏之味而供十方調御以伊蒲之饌而延五戒桑門禮化佛之懺儀誦雨花之秘呪香普薰於三界燈廣照於九幽叢此妙因用薦冥福伏願悟無生之忍尽有漏之緣百生千生乃至億生成滌性遮之障一地二地乃至十地漸趨正覺之

門

王盪蘭盆薦考妣疏

開除禁制實為大歡喜之辰升濟神明必仗解倒懸之會輒伸誠
悃仰扣覺慈伏念某稟賦孤惇早失怙恃低徊仕路每與三金之
悲拯拔幽塗尤念一乘之薦特蠲蒲供虔奉金容飯鷲嶺之高流
演魚山之雅頌哀茲福利上薦尊靈伏願摧煩惱之山裂愛慈之
網心疑頓釋若解百疊之花巾罪垢潛消如散八風之沙聚早生
淨土永脫塵緣

王盪蘭盆薦考妣疏

盪蘭建會為一眾自恣之辰具棄垂科實二尊追福之日輒憑梵
侶仰叩覺慈伏願依最上乘悟無生忍業障報障煩惱障罔不蠲
除信根定根精進根普皆證入受生補處得大揔持誦羨我之章
勞瘁敢忘於親念啟王盪蘭之會薦嚴恭伏於佛乘躬即寶祠用伸
丹悃伏願領後三義悟不二門薩婆若海中備聞法要波羅密字
內親觀佛光

薦考君懺華嚴經疏

葛謙白

香水海中塵二尺為佛土塵竭國內句句皆演真乘能依菩薩之
園林坐觀華嚴之境界先考待制伏願被精進之甲冑拔生死
之淤泥五根五力五覺支十行十迴向普皆證入頓致圓明
悟毗盧之法身不待寶金蓮綻受弥勒之秘記何須樓閣門開

薦考君看四大部經疏

竺乾遺教備演三乘寶藏流支獨先四部爰肅迎於梵侶俾持誦
於真詮恭啟法筵別施僧次設桑門蒲塞之饌焚此岸旃檀之香
綜此殊休虔祈冥福先考待制伏願聞第一義入不二門性業
遮業則无不消融理障事障則悉皆開悟由寶積之路早登涅槃
之山乘般若之船坐入華嚴之界

薦考君懺涅槃經疏

娑婆雙樹迦文顯示於泥洹拘尸大城師利親承於付囑雖金剛
之身豈虧於堅固然玉毫之相稍闕於光明宜憑最後之談用作

將來之眼 先考待制伏願會无爲之舍斷有漏之緣苦諦集滅道諦則无不證知常想我樂靜想則普皆證入百俱脰劫常現无边之身一刹那門超生不動之國

薦先妣忌日親誦維摩楞伽金光明楞嚴圓覺法華經疏稱性宣揚義存貝葉悼先持誦福過河沙而况毗耶談不二之門楞伽演百八之句百劫衆惡懺悔入金鼓之聲一解六亡縮疊契華巾之喻銷幻翳而顯本性之不動滅化城而知二乘之非真是皆法藏之秘文寶亦如來之了義虔宣梵度用薦冥塗先妣魏國夫人伏願絕邪見之稠林離三有之窟宅安養國內坐臨七寶之池觀史天中速到九廊之院

追薦考妣道場疏

李 去病

父嚴遽弃捨已改於新年母慈大違痛又臨於諱日深念怙恃之德定均覆載之恩顧不孝不肖之餘生負未死未報之重責雖知已囁於幽顯尚求升濟乎神明恭揚貝葉之文妙設伊蒲之供伏願先考修撰先妣真寧碩人初心不昧宿垢尽空直見佛於祇園不游魂於岱岳再念某近臨大墓肇起新祠稍治林泉粗興土木不知忌諱或犯威靈雖妄作之過難逃而追遠之心可憫欲陰謹之獲免賴聖力以無邊栢茂松深天長地久靜寐已安於丘壟高名永播於古今尽瀝哀誠仰憑至鑒

薦亡妻淑人水陸疏

孫 仲益

伏以常住真心一塵不立妙莊嚴海五濁皆空是故諸佛開衆生方便之門自然一念證無上菩提之路伏念某亡妻淑人章氏十年好合憂患垂離万里來歸死生契闊屬臨諱日祇叩真乘弘宣多貝葉之文瞻禮青蓮花之座龍天釋梵水陸空行遊戲神通恭敬圍繞伏願淑人章氏厭離火宅超悟二乘縮疊華巾解除六結後身了了畫沙之智已成曠劫冥冥觀河之見不昧

薦妻懺親誦華嚴經疏

葛 謙白

依輪圍十萬億刹寶顯性宗訪知識一百十城俱談真諦欲追影

福爰效薰持亡妻安人樊氏伏願壞無明鈎破隨眠甲視幻境如
熱時之燄消業障如風中之沙莊嚴閣前彈拍親聞於彌勒蘇摩
國內按頂常遇於文殊

介休縣君忌辰道場疏二首

黃魯直

穠如桃李鞠爲松栢之陰澗有蘋蘩莫助且蔓之薦歲將二紀哀
念如新式以諱辰敬修冥福願平生之競爽雖絕域而感通
江山阻長歲月徂謝冢上之木已拱室中之言未寒屬當撤瑟之
辰深念采蘋之助恭修佛供用薦冥途誓首蒼皇俯垂哀救

薦兄道場疏

入手功名凜二平生之壯志回頭夢幻悠二去國之孤魂行闕秋
風忽辭塵土故鄉明月空撫松楸一旦生違百年死別念骨肉之
恩莫報惟津梁之力可憑爰竭丹悰仰皈皇覓夜臺寂寂幽明已
隔於七旬法界恢恢煩惱頓超於六道

嗣功十八弟推官舉哀疏

黃魯直

禮服之衰雖名初從兄弟之義不異同生孤苦相依夷險一槩來
問投荒之客書墨未乾追尋細席之言德音猶在不謂禍成山岳
痛割肺肝然以宿植善根已成道種式延淨土少助勝因陳法供
於祇園演金文於具葉伏願嗣功十八弟推官最初一念不昧本
來隨願世緣還爲骨肉歸依大覺爲作證明

薦男請長老陞座疏

鄧志宏

幻體反空已失倚門之望潮音振地寧湏建鼓之求蓋禪悅之門
不殊今古故遊戲之際可度人天惟亡男歐寧令尹紹業箕裘律
身冰雪雖苦孝志於附鳳而涉世終於割雞陶令徑歸雅有林泉
之趣子文无愠何妨萋菲之讒氣方凜於長虹身忽先於朝露欲
追九泉之福可无一滴之禪而等慈有大比丘上面灰頭初不落
於兔角拈花豎拂亦何與於知毛尺吸西江均爲法雨生吞粟棘
高視叢林願假妙音喚迴英魄已脫南閩之苦便躋兜率之遊

薦女水陸疏

孫仲益

伏以死生之分定應同露電之觀父子之情鍾尚懷駒犢之愛仰
憑十力俯薦一哀伏念某亡女小師自天降以遭世罔極父罹大
謗罪遷于嶺表母懼不測憂死於蓐中以榮榮童孺八歲之餘而
呱呱號慕三年之久孤危極矣何恃而存疾病乘之遂隕其命念
私門之降戾致釋女之蒙辜歲行一周生還萬里不免水火亦負
九原沈痛之冤示見神通獨仗諸佛慈悲之救是用集桑門之勝
侶演秘藏之真乘洞然無藏之燈彌滿衆香之鉢海潮殷地花雨
翳空升濟幽明歸依佛祖伏願亡女洗心償一念之債彈指斷三
生之緣降伏衆魔滅除諸障觀一切有爲之法悟四大無常之身
普同有情俱證無漏

薦李氏女水陸疏

孫仲益

伏以衆生造十習因受無量苦諸佛證三摩地示大悲心一指彈
而沙界已周五體投而應身出現仰伸弘願俯罄一哀伏念某之
六疾所纏十生相續屬免身之彌月忽遇疾而甚亡四大無常日
藥靡救恍如一夢已隔九泉念茲齧臂之初莫救投車之痛是用
歸依寶王刹誓首大法輪發意圓成佇佛求應千燈普現八鏡交
光五色摩尼照濁水之源百寶蓮花兩娑婆之界伏願悟三生之
宿障洗曠劫之塵勞破煩惱濁爲解脫門斷生死根爲菩提種滅
諸國土障見自在天身如來會中作法王子三千世界十二類生
同躋極樂之方共獲逍遙之果

舅母十三太君舉哀疏

黃魯直

從學外家早蒙慈誨窺身裔土孤奉至恩拜書墨之末乾忽計音
之來及瞻雲万里空盡於一哀報德九冥恭投於三寶伏惟大覺
證明

薦秦國夫人道場疏二首

歐陽永叔

淑懿之賢已賁追榮之典陰幽之助仍資衆善之因爰即華林載
陳法供異慈仁之遠被均勝利於無窮秉此妙緣超昇福果
覺慈廣被兼濟於含生冥福所資必憑於慧力惟懿柔之秉德享

壽考而有終隆眷眷以不忘集勝緣而增備願乘妙道超薦真乘

追薦請長老升堂疏

開闢已降惟佛獨尊供養之中以法為勝莊嚴此坐祈為讚揚行解如師方堪舉唱潮音一吐沙界咸聞儻神識之有知庶輪回之不滯

追薦請長老升座疏

金甌浮雪玉篆團雲麪密奉珍蘋藪悉薦德以種種供養其所能也進禪說羞具法喜膳香浮乳酪味過醍醐以般若供養其所不能也蓋聞某師宗通說通我利人利以三昧口舌作六道津梁聲動人天恩滋存歿

追薦講圓覺經疏

邵公濟

四大分離誰為和合三世平等本無去來伏冀滅空翳花了幻垢相依清淨願力了增上妙心永斷輪回往大圓覺已向眼光落時薦取豈待葛藤髻頭方知普使一切衆生同證不壞法性

追薦設八菩薩道場疏

韓子蒼

有終有始雖古今委化之常惟孝惟慈乃子母無窮之義况追感之無地而求別以終天表哀痛心必皈依佛是用兩夕薰修之勝會修八菩薩之道場伏願彌勒指南普賢灌頂地藏處堅固地觀音發微妙音生生妙吉祥念念除業障虛空藏破開業力金剛手遮護凡情乘此大緣永歸妙果衍子孫之順孝保門戶以亨昌凡厥有情同霑勝利

追薦道場疏

汪彥章

伏以即水成漚起滅孰為自性將花覓果因緣悉是無明蓋圓通一了則觸境皆真取執二途則無方不得况履六塵之搖奪妄隨四大以拘纏現前而互別羣機究竟而本無一物出沒死生之苦海生成煩惱之癡根月以指標詎可拍端而認月跡因空有云何跡內以忘空若非法力之宣揚誰識心源之解脫是佛慈悲之勝力隨人方便以開權伏念某人慧性夙明真詮冥契昔時鷲嶺同

為聽法之人今日龍宮偶墮非男之數自返涅槃之趣俄與窀穸之哀雖多生分段之何常然善眷攀緣之罔極是用前瞻瑞相恭啓琅函承微笑而演圓音說大乘而專滿字願託人天之調御長陪帝釋之遨遊於彈指頃而超過十方於剎那間而普知三世維摩室內頓憑燈相以回心舍利緣中速轉女身而證道

追薦東坡先生疏

李方叔

端明尚書德尊一代名滿五朝道大不容才高為累惟行能之蓋世致忌媚之為仇久蹭蹬於禁林不遇故去遂飄零於瘴海卒老于行方幸賜環忽聞亡鑑識與不識罔不盡傷聞所未聞吾將安做皇天后土知一生忠義之心名山大川還千古英靈之氣數斯丈之興廢占吾道之盛衰茲乃公議之共憂非獨門人之私義所恨一違師席九易歲華意徒生還遂為死別慕子貢築場之意每罄哀誠誦普賢行願之文庶資冥福阿僧祇劫為轉法輪堪率陀天願居福地仰祈諸聖俯鑒微情

追薦秦大師齋僧疏

濟世出世圓機蓋本全提捨生受生游戲不妨自在要知無上妙用當屬沒量大人恭惟 大師申王敗海懸百戰之難起石室三昧之定出赤子於兵火置之清涼立皇基於金湯屹然鞏固既畢濟於悲願乃復歸於淨方彼時此時初無差別前佛後佛皆我導師尚不忘於津梁俾采趨於覺路

追薦曾丞相疏

毛伯穎

人之云亡時既傷於殄瘁士為知己義不負於幽明故相黃公披禍亂以立朝廷薦賢才而報人主功虧一篑恨徒積於重泉難贖百身墳已荒於宿草山川悠遠歲月眇徂永懷夙昔之音容誰主春秋之祭祀丘墟東閣空嘆彈鋏之聲慟哭西州莫致生芻之莫屬此中元之日聊伸下客之情憑仗佛乘資薦冥路伏願聰明徇達之性不昧本來清淨莊嚴之鄉早登解脫法界海惠猶如虛空世世生生相為善友

追薦席大資疏

高山仰止方勤模範之依梁柱摧乎忽報光靈之殞歎斯文之將
墜悼知己之難逢江海脩塗計音遠至衣冠清議悲憤同声天道
難堪百身何贖撫棺一慟奔馳難造於凡筵築室三年封植未知
於丘壠興言及此墮淚何勝惟憑西竺之淨緣仰薦東維之逝魄
歿故參政大資相公伏願本來道學不時死生夢寐可占猶識衛
公之精爽山丘所歷還同謝傳之生存證鄉真乘超登覺路一彈
指願徧慈氏樓閣之遊正法眼中入普賢行願之海

追薦秦少游疏

東坡

生前莫逆蓋緣氣合而類同死獨未忘將見情鍾而禮具伏為歿
故少游秦君學士早雖穎茂觸事遑迤晚向仕途方霑祿養未厭
北堂之歡樂遽逢南海之播遷頓足牽衣哭妻孥於道左含酸吐
苦頽鄉國於淮壩首尾八年憂驚百態同時逐客膺大需而盡復
中原唯子莫年厄終窮而歿于瘴域林泉夜夢猶疑杖屨之並遊
風月扁舟尚想江湖之共泛追傷何補焚誦乃功庶仗真詮掃除
風瘴而况真源了了素已悟於本心淨目昭昭无復加於妄翳便
可神遊淨土岸到菩提永依諸上善人常住無所還地

追薦馮大學疏

李 去病

伏以鄉閭晚輩每望先生之後塵詩禮衰門豈有孺子之可教辱
知辱愛愈久愈新念臭味之偶同譬諸草木而蹤跡之相避動如
參商夢寐常勤於寸心寒温久廢於尺紙以一介湮沉之舊當眾
人趨附之初媿無因以得前安所恃而自弃三薰三沐方圖晚節
之歸一死一生已抱窮天之恨式陳淨供仰薦冥游既宿植於善
根想益堅於願力諸妙樓閣早伺彌勒之登九品蓮花永受慈尊
之記

追薦邵先生疏

毛 伯穎

築室三年悼光靈之浸遠生芻一束慨精爽之如存敢課秘言少
資冥路其官文章爾雅德義可尊沉鬼浮魂當作山川之綱紀格

言善行蔚爲老成之典刑壽考歸全哀榮無憾願垂歆答早遂超
升垂裕後昆克保韋平之繼世鑒臨知舊永爲孔李之通家

追薦知命百日疏

黃魯直

春鴿在原汝有急難之義虎兕出柙我無保惠之功書墨未乾計
音來即水火不免將何面以見先親股肱或虧念誰依而終晚歲
逮此卒哭幾欲無生躬掃祕園親供緇侶冀憑大覺之力少慰九
冥之思稽首慈尊惟垂悲救